

名
医
医
案
精
华



★本书由远中子制作珍藏★

内 容 提 要

医案是前人治病纪录，有理论、有法则、有方药、充分表现了医生在临床时如何掌握治疗规律，进行独立思考和灵活运用。不仅初学者作为参考，富有指导性和启发性，就是一般开业医师也可通过各家医案不断地提高业务水平。

本书从清代名医叶天士、薛生白、吴鞠通等 20 位的医案中选取了 2069 条，包括常见病和疑难杂症，类别详明，文字浅显通俗，切合于实际应用。

王旭高醫案精華

上海秦伯未編纂

內傷

病將一載。肝氣橫逆而不平。中氣久虛而不振。惟肝逆故胸脘阻塞而攻衝。惟中虛故營衛不和而寒熱。凡大便溏。飲食少。右脈細。左脈弦。是其證也。四君子合逍遙加左金。是其治也。

黨參 冬朮 陳皮 茯苓 歸身 神麴 白芍 柴胡 香附 川連 穀芽 玫瑰花

三焦相火。挾肝陽而上升。每日侵晨則氣自臍左而上衝。心胸痞塞。自覺胸中熱。舌尖辣。面色紅。過午則氣漸下降。至夜則安而火降。則下或遺泄。此皆無形之火爲患也。推其原始。由乎陰虛。今則相火妄行。蒸鍊胃液成痰。所以吐痰黏膩灰黑。而咽喉胃管之間。常覺不流利也。法當清相火導虛陽而下歸窟宅。更佐以化痰鎮逆。病來已久。難期速效。

黃柏 桂心 砂仁 蛤殼 甘草 知母 川連 茯苓 元精石

凡藏邪惟虛則受之。而實則不受。惟實者能傳。而虛則不傳。仲景云。肝病實脾。治肝邪之盛也。內經云。肝病緩中。治肝體之虛也。此證肝氣有餘。肝血不足。法宜兩顧爲得。

歸身 白芍 沙苑 杞子 冬朮 茯神 青皮 陳皮 香附 金鈴子 砂仁

有時驚悸。有時肌肉頑木。或一日溏泄數次。或數日一大便而堅乾。惟小便常紅。此心氣鬱結。脾氣失運。失運則生溼。鬱結則聚火。火則傷津。溼則阻氣。而氣機不利矣。擬荆公妙香散加味。以補益心脾。

山藥 洋參 黃耆 茯神 赤苓 桔梗 炙草 遠志 麝香 硃砂 木香 川連 麥冬

血不養心。則心悸少寐。胃有寒飲。則嘔吐清水。虛火燦金。則咽痛。肝木乘中。則腹脹。此時調劑最難。熨貼蓋補養心血之藥。多嫌其滯。清降虛火之藥。又恐其滋。欲除胃寒。慮其溫燥。劫液欲平肝木。恐其克伐耗氣。今仿胡洽居士法。

專治其胃。以胃爲氣血之鄉。土爲萬物之母。一舉而三善備焉。請試服之。

黨參 冬朮 茯苓 半夏 棗仁 扁豆 陳皮 山藥 秫米

久病之軀。去冬常患火升。交春木旺。肝胆陽升無制。倏忽寒熱。頭面紅腫。延及四肢。熾熱癢痛。殆卽所謂游火游風之類歟。匝月以來。腫勢已減。四五日前偶然偶體傷風。遂增欬嗽音啞。痰多口乾。舌白。續發寒熱。胃氣從此不醒。元氣愈覺難支。風火交煽。痰濁復甚。陰津消涸。陽不潛藏。此時清火養陰。計非不善。抑恐滋則礙脾。化痰扶正。勢所必需。又恐燥則傷液。立法但取其輕靈。用藥先求其無過。

北沙參 知母 鮮生地 蛤殼 海浮石 蟬衣 豆卷 青果 海螵 地栗 百合

另珠粉

中風

體肥多澤。性躁多火。十年前小產血崩。血去則陰虧而火亢。肝風暗動。筋

絡失養。已非一日。去秋伏暑後變三瘧。瘧久營衛偏虛。遂致風痰擾絡。右半肢體麻痺。而爲偏廢之象。調理漸愈。今但右足麻辣熱痛。痛自足大指而起。顯係肝經血虛失養。據云腿膝常冷。足脛常熱。此非足脛有火。而腿膝有寒也。想由溼火乘虛下注。故痛處覺熱。而腿膝氣血不足。則覺寒耳。至於左脛外廉皮肉之內。結核如棉子。發作則痛甚。此屬筋箭。是風痰瘀血交凝入絡而成。與右足之熱痛麻辣不同。今且先治其右足。

生地 阿膠 五茄皮 歸身 木瓜 天麻 冬朮 獨活 絲瓜絡 牛膝 茯苓 草薢

腎藏精而主骨。肝藏血而主筋。腎肝精血衰微。筋骨自多空隙。濕熱痰涎乘虛入絡。右偏手足無力。舌根牽強。類中之根。溫補精血。宣通經絡。兼化痰涎。守服不懈。加以靜養。庶幾卻病延年。

菴蓉 黨參 牛膝 半夏 杞子 陳皮 續斷 茯苓 巴戟 桑枝

又丸方

從蓉 黨參 熟地 麥冬 桑仁 巴戟 歸身 萆薢 首烏 茯神 牛膝 半夏 天冬
陳皮 杜仲 虎骨 菖蒲 杞子 製炒研末用竹瀝薑汁搗入再將白蜜爲丸如黍米大每朝
服開水送下

痿痺

先天不足。骨髓空虛。常以後天滋補。栽培脾胃。脾胃得補。溼熱壅滯。形體
驟然充壯。而舌本牽強。兩足痿軟。不能行走。上盛下虛。病屬痿躄。經云。溼熱不
攘。大筋軟短。小筋弛長。軟短爲拘。弛長爲痿。是也。今擬法補先天之精氣。強筋
壯骨。以治其下。扶後天之脾胃。運化溼熱。以治其中。然必耐心久服。確守弗懈。
庶克獲效。倘朝秦而暮楚。恐難許收功也。

熟地 茯苓 牛膝 桑枝 虎胥骨 川斷 巴戟 黃柏 蒼朮 萆薢 竹瀝 薑汁
又洗方

獨活 當歸 紅花 陳酒糟 猪後脚骨 葱白頭

伏熱留於肺胃。胃熱則消穀易飢。肺熱則噎痿難行。熱氣熏於胸中。故內熱不已。延今半載。節屆春分。天氣暴熱。病加不寐。據述先前舌苔黃黑。今則舌心乾紅。其陰更傷。仿仲景意。用甘寒法。

生地 知母 茯神 棗仁 麥冬 滑石 夜合花 沙參 百合

冷雨淋背於先。竭力鼓棹於後。勞碌入房。挾雜於中。病起身熱。欬嗽至今四十餘日。痰氣腥臭。飲食能進。臥牀不起。形肉消脫。是肺先受邪。而復傷其陰也。經云。陰虛者陽必湊之。肺熱葉焦。則生痿躄。又云。一損損於肺。皮聚毛落。至骨痿不能起牀者死。合經旨而互參之。分明棘手重證矣。

沙參 紫苑 茯苓 地骨皮 川貝 玉竹 薏仁 八仙長壽丸

又肺爲水源。百脈朝宗於肺。猶衆水朝宗於海也。肺熱葉焦。則津液不能灌輸於經脈。而爲痿躄。臥牀不能行動。形肉消削。欬嗽痰臭。舌紅無苔。脈細而數。

是皆津液消耗。燥火內灼之象。考經論治痿。獨取陽明者。以陽明主潤宗筋。胃爲氣血之源耳。今擬生胃津。以供於肺。仿西昌喻氏意。

沙參 阿膠 杏仁 甘草 元參 火麻仁 天冬 麥冬 玉竹 茯苓 桑葉 枇杷葉

寒溼之氣。從外而入於內。遍體歷節疼痛。而又胸滿嘔痰。經云。從外之內者。治其外。又云。胃爲藏府之長。束筋骨。利機關。皆胃氣之流行。然則外通經絡。內和胃氣。便是治法之綱領矣。

川附 茯苓 南星 半夏 陳皮 木瓜 竹瀝 薑汁

內風

病起肝風。繼增痰飲吐酸。所以口目筋掣。而胸膈不利也。近因暑熱上蒸。咽喉碎癢。暫投涼劑。喉患雖減。而胸膈愈覺撐脹。夫肝風之動。由於陰血之虛。痰飲之生。又係胃陽之弱。病涉兩歧。法難並用。今且宣化胃溼。以祛痰。稍佐平肝降逆之品。

半夏 茯苓 陳皮 旋覆花 麥冬 杏仁 川貝 鬱金 丹皮 黑山梔 竹茹 薏仁

肝爲風藏而主筋。心爲火藏而主脈。心包絡與三焦相爲表裏。俱藏相火。心包主裏。三焦統領一身之絡。此病起於病後。心中饑熱。胸前跳躍。繼而氣攻背脊。如火之灼。或大或小。或長或短。皆在經絡脊脈之中。良由病後絡脈空虛。相火內風。走竄入絡。非清不足以熄火。非鎮不足以定風。然而絡脈空虛。使非堵截其空隙之處。又恐風火去而復入。故清火熄火填竅三法。必相須爲用也。第此證實屬罕見。醫者意也。以意會之可耳。倣仲景法。

羚羊角 寒水石 滑石 紫石英 龍骨 石決明 生石膏 礞石 赤石脂 牡蠣

大黃 甘草

瘧厥日數發。口噤不能言。而心中了了。病不在心而在肝。夫心爲君主。肝爲將軍。當氣逆火升風動之際。一如將在外。君命有所不受。君主雖明。安能遽禁其強暴哉。況胃爲心之子。胃家之痰。與肝家之風火。互結黨援。相助爲虐。今

舌紅碎痛。一派炎炎之勝。漸迫心君。故欲化胃家之痰。必先清泄肝家之風火。而安鎮靈臺。使心君無震撼之虞。尤爲要着。

羚羊角 鮮生地 犀角 茯神 山梔 元參 石決明 天竺黃 鉤鈎 棗仁 川瀝
金箔

五藏六府之精氣。皆上注於目。目之系上屬於腦。後出於項。故凡風邪中於項。入於腦者。多令目系急而邪視。或頸項強急也。此證始由口目牽引。乃外風引動內風。內風多從火出。其原實由於水虧。水虧則木旺。木旺則風生。至於口唇乾燥赤碎。名飭唇風。亦肝火胃火之所成也。治當清火熄風。養陰爲法。

大生地 丹皮 沙參 鉤鈎 桑葉 羚羊角 石決明 白芍 芝麻 蔗皮 梨皮

元參心 川石斛

神志

上年夏季痰火迷心。神呆語亂。治之而愈。至今復發。脈浮小弱。舌心紅而

苔薄白。語言錯亂。哭笑不常。憑脈而論。似屬心風。蓋由風入心經。蘊熱蒸痰所致。用本事獨活湯法。

獨活 防風 黃芩 山梔 元參 石菖蒲 膽星 茯苓 橘紅 甘草 竹葉 鮮生地

情志鬱勃。心肝受病。神思不安。時狂時靜。時疑時怯。心邪傳肺。則心悸不寐而欬嗽。肝邪傳膽。則目定而振慄。其實皆鬱火爲患也。擬清心安神壯膽爲主。平肝和脾佐之。

川連 茯神 菖蒲 龍骨 遠志 北沙參 棗仁 膽星 川貝 鐵落 石決明 豬膽

寡居十載。愁惕苦心。牙齦出血。有時若癰。其病已久。茲一月前猝遭驚恐。遂神糊語亂。口吐紫血。腹脹不食。兩脈模糊。難以捉摸。此乃驚動肝陽。神魂擾亂。血隨氣逆。是卽薄厥之屬。今兩足常冷。陽升於上。急以介類潛陽。重以鎮靜。冀其厥止再商。

川連 牡蠣 阿膠 茯神 棗仁 石決明 羚羊角 龍骨 茜草炭 紫石英 代赭石

白芍 金箔

■ 痰 飲

心境沉悶。意願不遂。近因患瘧。多飲燒酒。酒酣之後。如醉如狂。語言妄亂。及今二日。診脈小弦滑沉。舌苔薄白。小水短赤。大便不通。渴欲飲冷。昏昏默默。不知病之所在。因思瘧必有痰。酒能助火。痰火內擾。神明不安。此少陽陽明同病而連及厥陰也。少陽爲進出之樞。陽明爲藏邪之藪。今邪併陽明。瀰漫心包。故發狂而又昏昏默默也。仿仲景柴胡加龍牡湯主之。

柴胡 黃芩 半夏 茯苓 龍骨 甘草 牡蠣 鉛丹 菖蒲 大黃 竹瀝 薑汁

體肥多溼之人。溼熱蒸痰。阻塞肺胃。喉中氣粗。呼吸如喘。臥寐之中。常欲坐起。仍然鼾睡而不自知。所以起坐之故。蓋痰阻氣鬱。蒙閉清陽。陽氣鬱極。則欲伸。故寐中欲坐起也。病屬痰與火爲患。茲擬煎方開其肺痺。另用丸藥化其痰火。痰火一退。清陽得伸。病自愈矣。

射干 橘紅 冬瓜子 杏仁 桔梗 象貝 竹瀝 薑汁 葶藶子 蘇子 枇杷葉
又九方

黑丑 萊菔子 檳榔 大黃

膽虛則神自怯。氣鬱則痰自凝。於是咽喉若塞。氣短似喘。偶值煩勞。夜寐多驚。無形之氣。與有形之痰。互相爲患。遂至清淨無爲之府。與虛靈不昧之神。均失其甯謐之常。欲安其神。必化其痰。欲壯其膽。必舒其氣。故清之化之。和之益之。必相須爲用也。

沙參 棗仁 半夏 膽星 遠志 茯神 神麴 石菖蒲 橘紅 金箔 竹瀝 薑汁

胸中之元陽不足。膈中之火用不宣。痰飲伏於心下。胸前如盤大一塊。常覺板冷。背亦惡寒。三四年來。每加子後則氣喘。陽氣當至不至。痰飲阻遏其胸中。陽微陰勝故也。天明則陽氣張。故喘平。至欬嗽心悸。易於驚恐。皆陰邪竊踞胸中之病。其常若傷風之狀者。衛外之陽亦虛也。圖治之治。當祛寒飲而逐陰。

邪。尤必斡旋其陽氣。俾如離照當空。而後陰邪盡掃。用仲景苓桂朮甘法。先通胸中之陽。再議。

茯苓 桂木 冬朮 陳皮 甘草 炮薑 補骨脂 黨參 半夏 紫石英 胡桃肉
蠲螺殼 細辛

欬嗽口不渴。常臍痛而脈細。頭常眩運。此乃手足太陰二經有寒飲積滯。阻遏清陽之氣。不能通達。故一月之中。必發寒熱數次。乃鬱極則欲達也。病將四月。元氣漸虛。寒飲仍戀而不化。先以小青龍湯。蠲除寒飲。宣通陽氣。再議。

麻黃 桂枝 白芍 細辛 乾薑 半夏 五味子 甘草

脈沉取之數。其陰內虧。其熱在裏。病延日久。勞損之候。證見欬唾白痰。腕腹時痛。痛則氣滿。得矢氣則稍寬。病由肝鬱而成。據云欬已三年。初無身熱。是其根又有痰飲也。經訓治病必求其根。茲從痰飲氣鬱例治之。

半夏 茯苓 桂木 丹皮 白芍 香附 沈香 神麴 歸身 甘草 冬朮 陳皮

金橘餅

痰飲欬嗽已久。其源實由於脾腎兩虧。柯氏云。脾腎爲生痰之原。肺胃爲貯痰之器也。近增氣急不得右臥。右臥則欬劇。肺亦傷矣。肛門漏瘍。邇來糞後有血。脾腎虧矣。幸胃納尚可。議從肺脾腎三經同治。然年已六旬。宜自知愛養爲要。否則慮延損證。

熟地 五味子 炮薑 半夏 陳皮 茯苓 阿膠 款冬花 冬朮 歸身 川貝

飢飽勞碌傷胃。寒痰凝聚。氣血稽留。阻於胃絡。因而胃脘脹痛。嘔吐黏痰。初起一發即平。後來發作愈勤。今則殆無虛日。飲食從此減少。病日益甚。胃日益虛。倘不加謹。恐延脹滿。不易圖治。

黨參 炮薑 冬朮 熟附 半夏 良薑 陳皮 茯苓 薏仁

■ 欬 喘

稗齡形瘦色黃。痰多食少。晝日微欬。夜寐則喉中啞吼有聲。病已半載。而

性畏服藥。此脾虛而淫熱蒸痰。以阻於肺也。商用藥棗法。

人參 蒼朮 茯苓 川朴 樺子 炙草 陳皮 川貝 宋製半夏 冬朮

右藥各研末。和一處。研聽用。好大棗一百枚。去核。將上藥末納入棗中。以綫紮好。每棗一枚。大約納入藥末二分爲准。再用甜葶藶一兩。河水兩大碗。同煮。俟棗軟熟。不可大爛。將棗取出曬乾。每飢時將棗細嚼嚥下一枚。一日可用五六枚。餘下棗湯。去葶藶再煎濃至一茶杯。分三次先溫服。俟棗乾然後食棗。

年過花甲。腎氣必虧。即使善自調攝。亦不過少病耳。及至既病。則各隨其見證而施治焉。今欬嗽氣升。食少倦怠。證形在於肺脾。自宜從肺脾求治。然氣之所以升者。卽腎水虛而不能藏納肺氣也。食葷油則大便溏者。卽腎陽衰而不能蒸運脾土也。然則補腎尤爲喫緊。雖不治脾肺。而脾肺得蔭矣。

黨參 五味 山藥 紫石英 補骨脂 萸肉 胡桃肉 茯苓 金匱腎氣丸

喘哮氣急。原由寒入肺。痰凝胃絡而起。久發不已。肺虛必及於腎。胃虛

必累於脾。脾爲生痰之源。肺爲貯痰之器。痰戀不化。氣機阻滯。一觸風寒。喘卽舉發。治之之法。在上治肺胃。在下治脾腎。發時治上。平時治下。此一定章程。若欲除根。必須頻年累月。服藥不斷。倘一暴十寒。終無濟於事也。

發時服方

款冬花 桑白皮 紫苑 蘇子 沉香 茯苓 杏仁 橘紅 製半夏 黃芩

平時服方

五味子 紫石英 陳皮 半夏 茯苓 薏仁 蛤殼 胡桃肉 杜仲 熟地

又喘哮頻發。脈形細數。身常惡寒。下焦陰虛。中焦痰盛。上焦肺弱。肺弱故畏寒。陰虛故脈數。喘之頻發。痰之盛也。有所感觸。病遂發焉。病有三層。治有三法。層層獲衛。法法兼到。終年常服。庶幾見效。否則恐無益也。

發時服方

桂枝 款冬花 橘紅 杏仁霜 萊菔子 桑白皮

右藥共研末用枇杷葉十片去毛煎湯再用竹瀝半茶杯煎汁一酒杯相和一處將上藥末泛丸發喘時每至臥時服此丸薏仁橘紅湯送下

平時服方

熟地 丹皮 山萸肉 茯苓 牛膝 澤瀉 肉桂 山藥 五味子 磁石

右藥爲末用煉白蜜搗和搦作小丸丸須光亮俟半乾再用製半夏陳皮炙甘草研極細末泛爲衣每朝服發時亦可服

心欬之狀。欬則心痛。喉中介介如梗狀。甚則咽腫喉痺。蓋因風溫襲肺。引動心包之火上逆。故治法仍宜宣散肺經風邪。參入甯心緩火之品。仲景方法。略示其端。但語焉未詳。後人不能細審耳。

前胡 杏仁 象貝母 桔梗 射干 麥冬 遠志 沙參 小麥

五藏皆有欬。總不離乎肺。肺爲嬌藏。不耐邪侵。感寒則欬。受熱則欬。初起微有寒熱。必挾表邪。邪戀肺虛。脈形空大。前方降氣化痰。保肺滌飲。俱無少效。

據云。得汗則身體輕快。想由肺氣雖虛。留邪未淨。補虛而兼化邪。亦一法也。用錢氏法。

牛蒡子 馬兜鈴 杏仁 阿膠 蘇子 桑白皮 款冬花 炙甘草 茯苓 枇杷葉 桑葉

又。欬嗽止而失血音啞。津液枯槁。勞損成矣。脈形細弱。精氣兩虧。內經於鍼石所不及者。調以甘藥。金匱遵之。而用黃耆建中湯。急建其中氣。俾得飲食增而津液旺。冀其精血漸充。復其真陰之不足。蓋捨此別無良法也。

黃耆 白芍 北沙參 甘草 玉竹 麥冬 川貝 茯苓 橘餅

失血

脈數血不止。胃氣大虛。胸中痞塞。大便常結。是痞爲虛痞。數爲虛數。欬血三月。今忽衝溢。唇白面青。斷非實火。大凡實火吐血。宜清宜降。虛火吐血。宜補宜和。古人謂見痰休治痰。見血休治血。血久不止。宜以胃藥收功。今擬一方。援

引此例。未知有當高明否。

人參 扁豆 川貝 茯神 藕汁 京墨 炮薑

又脈數退。血少止。藥病相當。頗得小效。而反惡寒汗出者。蓋血脫則氣無所依。氣屬陽主外。衛虛則不固。故惡寒而汗出。最怕喘呃暴脫。措手莫及。猶幸胸痞已寬。稍能容納。仿血脫益氣之例。經曰。陽生陰長。是之謂耳。

人參 扁豆 五味子 炙甘草 炮薑 炒山藥 鮮藕汁

又血止三日。而痰吐如污泥且臭。是胃氣大傷。肺氣敗壞。而成肺痿。痿者萎也。如草木之萎而不振。終屬勞損沈疴。極難醫治。外臺引用炙甘草湯。取其益氣生津。以救肺之枯萎。後人遵用其方。恆去薑桂之辛熱。此證面青不渴。正宜溫以扶陽。但大便溏薄。除去麻仁之滑潤可耳。

人參 炙甘草 麥冬 阿膠 生地 炮薑 肉桂 五味子 紫石英

久欬失血。精氣互傷。連進滋培。頗獲小效。但血去過多。驟難充復。從來血

證。肺腎兩虛者。宜冬不宜夏。蓋酷暑炎蒸。有水涸金消之慮耳。今雖炎暑未臨。而已交仲夏。宜與生精益氣。大滋金水之虛。兼扶胃氣。則金有所恃。且精氣生成於水穀。又久病以胃氣爲要也。

洋參 麥冬 五味 熟地 生地 黨參 黃耆 山藥 炙草 陳皮 茯神 扁豆

始由寒飲欬嗽。繼而化火動血。一二年來。血證屢止屢發。而欬嗽不已。脈弦形瘦。飲邪未去。陰血已虧。安靜則欬甚。勞動則氣升。蓋靜則屬陰。飲邪由陰生也。動則屬陽。氣升由火動也。陰虛痰飲。四字顯然。擬金水六君同都氣丸法。補腎之陰以納氣。化胃之痰以蠲飲。飲去則欬自減。氣納則火不升也。

生地 半夏 麥冬 五味子 訶子 紫石英 丹皮炭 牛膝 懷山藥 蛤殼 茯苓

青鉛 枇杷葉 海浮石

去秋欬嗽。些微帶血。已經調治而痊。交春吐血甚多。欬嗽至今不止。更兼寒熱。朝輕暮重。飲食少納。頭汗不休。真陰大虧。虛陽上亢。肺金受燥。脾胃傷戕。

津液日耗。元氣日損。脈沉細澹。口膩而乾。虛極成勞。難爲力矣。姑擬生脈六君子湯保肺清金。調元益氣。扶過夏令。再議。

洋參 沙參 麥冬 五味子 扁豆 製半夏 茯神 陳皮 炙甘草 枇杷葉露

野薺薇露

內則陰虛有火。外則寒邪深襲。失血欬嗽。又兼三瘧。病已數月。瘧來心口痠痛。胸腹空豁難通。經云。陽維爲病。苦寒熱。陰維爲病。苦心痛。此陰陽營衛之偏虛也。擬黃耆建中法。和中藏之。陰陽而調營衛。復合生脈保肺之陰。復脈保腎之陰。通盤打算。頭頭是道矣。

歸身炭 炙甘草 大生地 五味子 鱉甲 黃耆 青蒿 沙參 白芍 阿膠 麥冬

煨生薑 紅棗

虛損

歷春夏秋三季。血證屢發。診脈虛弱。形容消瘦。年方十七。精未充而早泄。

陰失守而火升異日難名之疾。恐犯褚氏之戒。治當滋水降火。須自保養爲要。

生地 阿膠 麥冬 山藥 丹皮 茯神 洋參 扁豆 茜草根 蓮肉 茅根 鮮藕

陽維爲病苦寒熱。陰維爲病苦心痛。陽維維於陽。陽氣弱則腹痛而便溏。陰維維於陰。營陰虛則心痛而舌紅也。脈微形瘦。陰陽並損。損及奇經。當以甘溫。

黃耆 桂枝 當歸 炙甘草 白芍 川貝 陳皮 砂仁 鹿角霜

先後天俱不足。痰多鼻血。陰虧陽亢之徵。納少腹痛。木旺土衰之兆。是以年將及冠。猶如幼穉之形。面白無華。具見精神之乏。治先天當求精血之屬。培後天須參穀食之方。久久服之。庶有裨益。若一暴十寒。終無濟也。

六君子湯去半夏 加山藥 扁豆 砂仁 黑芝蔴 蓮肉 陳粳米

九方

熟地 兔絲子 牛膝 白芍 龜板 杞子 山藥 五味子 當歸 杜仲 丹皮 黃柏

茯苓 鹿角膠 萸肉 天冬 澤瀉 右藥爲末用河車一具洗淨煮爛將藥末搗和爲丸

左寸關搏指。心肝之陽亢。右脈小緊。脾胃之虛寒。是以腹中常痛。而大便秘。不實也。病延四月。身雖微熱。是屬虛陽外越。近增口舌碎痛。亦屬虛火上炎。津液消灼。勞損何疑。今商治法。當以溫中爲主。稍佐清上。俾土厚則火斂。金旺則水生。古人有是論。幸勿爲世俗拘也。

黨參 於朮 茯苓 甘草 炮薑 五味子 麥冬 燈心

北門之籥得守。則陽氣固。坤土之陽得運。則溼濁化。溼濁化則津回。陽氣固則精守。所嫌肌肉盡削。夫肌肉猶城垣也。元氣猶主宰也。城垣傾頽。主宰窮困。是非大補元氣不可。

人參 熟地 萸肉 杞子 杜仲 炙草 歸身 山藥 茯苓 於朮 陳皮 麥冬 半夏 茯苓 穀芽

消證

脈沉細數。瀉血虛氣鬱。經事之不來宜也。夫五志鬱極。皆從火化。飢而善食。小水澄腳如膿。三消之漸。匪伊朝夕。然胸痛吐酸。肝鬱無疑。肝爲風藏。鬱甚則生蟲。從風化也。姑擬一方。平中見奇。

川連 麥冬 蛤殼 建蘭葉 鮮棟樹根皮

又服藥後大便之堅且難者。化溏糞而易出。原屬苦泄之功。然脈仍數。瀉究屬血虛而兼鬱熱。鬱熱日甚。藏陰日鑠。舌紅而碎。口渴消飲。所由來也。月事不至。血日乾而火日熾。頭眩目花。帶下皆陰虛陽亢之見證。補藏陰爲治本之緩圖。清鬱熱乃救陰之先着。轉輾思維。寓清泄於通補之中。其或有濟耶。所慮病根深固。未易奏績耳。

川連 黃芩 黑梔 生地 當歸 阿膠 川芎 白芍 建蘭葉 大黃蜜蟲丸

又經云。二陽之病發心脾。不得隱曲。女子不月。其傳爲風消。風消者火盛而生風。渴飲而消水也。先輩謂三消爲火疾。久而不已。必發癰疽。余屢用涼血清

火之藥。職此故也。自六七月間足跗生疽之後。所患消證。又稍加重。其陰愈傷。其火愈熾。今胸中如燔。牙痛齒落。陽明之火爲劇。考陽明之氣血兩燔者。葉氏每用玉女煎。姑倣之。

鮮生地 石膏 知母 元參 牛膝 川連 大生地 天冬 麥冬 茯苓 甘草 枇杷葉

嘔 噦

投溫中運滯。腹中呱呱有聲。朝食則安。暮食則滯。臥則筋惕肉瞤。時吐酸水。中土陽微。下焦濁陰之氣上逆。病成反胃。溫中不效。法當益火之源。捨時從證。用茅朮附子理中湯合真武湯意以治之。

茅朮 附子 炮薑 炙草 陳皮 茯苓 生薑

內經云。三陽結爲之膈。三陰結爲之水。此證反胃而兼浮腫。是三陰三陽俱結也。陰陽俱結。治法極難。前方用華撥牛乳飲調服。沉香血珀末撥動其陰。

陽俱結之氣。幸反胃之勢已平。是其三陽之結已解。今腹滿雖寬。而腿足之腫。仍若是。三陰之結猶未解也。蓋太陰無陽明之陽。少陰無太陽之陽。厥陰無少陽之陽。則陰獨盛於內。而陽氣不通。陰氣凝滯。膀胱不化。而水成焉。其脈沉細。蓋重陰之象也。凡補脾崇土。溫潤通陽。如理中腎氣丸之屬。固亦合法。然不若周慎齋和中丸之制爲尤妙。以其用乾薑能回陽明之陽於脾。肉桂回太陽之陽於腎。吳萸回少陽之陽於肝。則三陽氣勝。而三陰之結解。水自從膀胱出矣。

乾薑 肉桂 吳萸 黨參 茯苓 製半夏 甜杏仁 茅朮 右藥爲末。用神麴磨粉。煮糊搗

丸。朝暮用薏仁陳皮煎湯送下。

據述病由。喪子悲傷。氣逆發厥而起。今診左脈沉數不利。是肝氣鬱而不舒。肝血少而不濡也。右關及寸部按之滑搏。滑搏爲痰火。肺胃之氣失降。而肝木之氣上逆。將所進水穀之津液。蒸釀爲痰。阻塞氣道。故咽噎胸膈之間。若有積塞。而納穀有時嘔噎也。夫五志過極。多從火化。哭泣無淚。目濇昏花。皆屬陽

亢而陰不上承之象。目今最要之證。乃胸膈咽噎阻塞。的係膈氣根萌。而處治最要之法。順氣降火爲先。稍參化痰。復入清金。金清自能平木也。

蘇子 茯苓 半夏 枳實 杏仁 川貝 沙參 橘紅 麥冬 海螵

吐血後呃逆作止不常。迄今一月。舌苔白膩。右脈沉滑。左脈細弱。其呃之氣自少腹上衝。乃瘀血挾痰濁阻於肺胃之絡。而下焦相火。隨衝脈上逆。鼓動其痰。則呃作矣。病情並見。安可模糊。若捕風捉影。無惑乎其不效也。今酌一方。當必有濟。幸勿躁急爲要。

半夏 茯苓 陳皮 當歸 鬱金 丁香 柿蒂 水紅花子 柿蒂 藕汁 薑汁 東垣滋腎丸

陰虛挾溼之體。感受時令風邪。初起背微惡寒。頭略脹痛。欲欬不爽。發熱不揚。舌苔白膩。大便溏泄。此其常候也。峻投消散。暗劫胃津。以致飢而欲食。嗜臥神糊。呃忒斷連。斑疹隱約。證方八日。勢涉危機。閱周先生方。洵稱美善。鄙意僭加甘草一味以和之。其生津補中之力。未始非贊襄之一助也。若云甘能滋

溼。甘能滿中。孰不知之。須知苔薄白而光滑。胸不滿而知飢。乃無形溼熱。已有中虛之象。此葉氏所以深戒苦辛消克之劑也。幸知者察焉。

牛蒡子 石菖蒲 前胡 橘紅 鬱金 桔梗 天竺黃 刀豆子 神麴 連翹 甘草

薄荷 竹茹 枇杷葉

又證逾旬日。的係溫邪挾溼。病在氣營之交。苔白膩而邊紅。疹透點而不爽。寐則譫語。寤則神清。呃聲徐而未除。脈象莢而小數。周先生清營洩衛。理氣化濁。恰如其分。僭加一二味。仍候主裁。

犀角 天竺黃 川連 橘紅 鮮薄荷根 連翹 牛蒡子 通草 柿蒂 青鹽半夏 丁香

竹茹 茅根 枇杷葉

又熱處溼中。神蒙嗜臥。呼之則清。語言了了。驗舌苔之白膩。參脈象之莢數。知非熱陷膈中。乃溼熱瀰漫於上焦。肺氣失其宣布耳。呃尚未除。胃濁未化。擬從肺胃立法。

旋覆花 代赭石 冬瓜子 射干 杏仁 川貝 桔梗 鬱金 橘紅 沙參 通草 竹茹

茅根 枇杷葉

又便泄數次。黏膩垢污。胃濁以下行爲順。未始不美。故連日沉迷嗜臥。昨宵便惺惺少寐。但少寐則神煩。自覺有不安之象。且屢起更衣。愈覺倦乏不堪耳。今便泄未止。舌苔仍白。身熱已和。酒客中虛溼勝。擬和中化濁。仿子和甘露飲。

野於朮 洋參 赤苓 澤瀉 滑石 藿香 雞距子 葛花 木香 橘紅 通草 竹茹

凡證於陰陽虛實疑似之間。最當詳審。此證音低神倦似虛。而便泄臭水中。腕按痛實也。肢冷脈細似陰。而小便熱痛陽也。至於舌白黏語。乃痰蒙火鬱之徵。而日暮煩躁。爲陰虛陽盛之兆。鄙意百般怪證。多屬乎痰。痰蒙火鬱。清化不解。須從下奪。即使正虛。而虛中夾實。亦當先治其實耳。

羚羊角 天竺黃 石菖蒲 膽星 鮮石斛 茯神 橘紅 鬱金 竹瀝 薑汁 另滾痰丸

有汗發瘧。謂之柔瘧。瘧盛神昏。風淫火熾極矣。夫內風多從火出。欲熄其

風先須清火。欲清其火。必須鎮逆。考古有風引湯一法。多用石藥。其原論云。瘧發不止。醫不能療。風引湯主之。良由風火熾盛。草木諸藥。不能平旋動之威。非用石藥之慄悍滑疾者。不足以勝之。故曰醫不能療也。病極凶危。醫宜盡力。其然其否。尙祈高明裁正。

石膏 寒水石 紫石英 靈磁石 紫蛤殼 滑石 石決明 生地 阿膠 鈎鈎 牛膝炭

竹瀝 薑汁

素有肝胃病。適挾溼溫。七日汗解。八日復熱。舌灰唇焦。齒板口渴。欲得熱飲。右脈洪大數疾。左亦絃數。腕中仍痛。經事適來。靜思其故。假令肝胃病。木來乘土。氣鬱而痛。若不挾邪。斷無如此大熱。又大便堅硬而黑。是腸胃有實熱。所謂燥屎也。考胃氣痛門。無燥屎證。惟瘀血痛門有便血。而此證無發狂妄喜之狀。又斷乎非蓄血也。渴喜熱飲。疑其有寒。似矣。不知溼與熱合。熱處溼中。溼居熱外。必飲熱湯而溼乃開。胸中乃快。與真寒假熱不同。再合脈與唇觀之。其屬

溼溫挾積無疑。傷寒大白云。唇焦爲食積。此言諸書不載。可云高出千古。

豆豉 鬱金 延胡 山楂 香附 瓜蒌皮 連翹 赤苓 竹茹

又服藥後大便一次。色黑如栗者數枚。兼帶溏糞。脘痛大減。舌霉唇焦俱稍退。原爲美事。惟脈數大者變爲虛小無力。心中覺空。是邪減正虛之象。防神糊。瘳厥等變。今方九日。延過兩候乃吉。

香豉 青蒿 沙參 赤芍 川貝 鬱金 黑梔 竹茹 稻葉 金橘餅

暑病

素有痰飲欬嗽。今夏五月。曾經吐血。是肺受熱迫也。茲者六七日來。伏暑先蘊於內。涼風復襲於外。病起先寒慄而後大熱。熱勢有起伏。表之汗不暢。清之熱不退。所以然者。爲痰飲阻於胸中。肺胃失其宣達故也。夫舌色底絳而望之黏膩。獨舌心之苔白厚如豆大者一瓣。此卽伏暑挾痰飲之證。而況氣急痰嘶乎。據云廿六日便泄數次。至今大便不通。按腹板窒卻不硬痛。小水先前紅。

濁。今則但赤不渾。此乃溼熱痰濁聚於胸中。因肺金失降。不能下達膀胱。故溼濁不從下注。而反上逆爲痰氣喘咳之證也。病機在是。病之凶險亦在是。當從此理會滌痰泄熱。降氣清肺。乃方中必需之事。但清肅上焦。尤爲要務耳。

葶藶子 枳實 鬱金 杏仁 羚羊角 川貝 膽星 連翹 赤苓 竹瀝 薑汁 枇杷葉
滾痰丸

暑乃鬱蒸之熱。溼爲濡滯之邪。暑雨地溼。濕滯熱鬱。惟氣虛者受其邪。亦惟素有溼熱者感其氣。如體肥多溼之人。暑卽寓於溼之內。勞心氣虛之人。熱卽伏於氣之中。於是氣機不達。三焦不宣。身熱不揚。小水不利。頭額獨熱。心胸痞悶。舌苔白膩。底絳尖紅。種種皆溼遏熱伏之徵。顯係邪蘊於中。不能外達。擬以梔豉上下宣洩之。雞蘇表裏分消之。二陳從中以和之。芳香宣竅以達之。冀其三焦宣暢。未識得奏微功否。

六一散 黑梔 薄荷 豆豉 半夏 陳皮 石菖蒲 赤苓 鬱金 蔻仁 通草 竹茹

荷梗

又白苔漸退。而舌心反見裂紋。是溼轉燥矣。不飢不思食。小便仍不爽利。餘熱猶滯。三焦之氣未盡宣達也。三焦者一氣之周流。而各司其職。上焦主納而不出。下焦主出而不納。中焦則輸其出納。清陽出上竅。濁陰走下竅。三焦自協於平。今議從中升降其上下。所謂升降者。亦升其清而降其濁耳。

葛根 杏仁 赤苓 陳皮 紫苑 薏仁 川貝 澤瀉 血珀 竹茹 大麥 稻葉

投兩解法。得汗得便。竟得安然兩日。昨已起牀照鏡。啓窗看菊。須臾之間。漸漸發熱。熱甚神糊。兩目上視。幾乎厥脫。迨至黃昏。神識漸清。熱勢漸減。然脈沉不起。據述熱時舌色乾紅。熱退舌色黃膩。此乃溼遏熱熾。將燥未燥。但陽證陰脈相反堪虞。勉議河間甘露飲子。於滌熱燥溼之中。更藉桂以通陽。苓以通陰。復入草果祛太陰溼土之寒。知母清陽明燥金之熱。未識得奏膚功否。

寒水石 石膏 茯苓 澤瀉 茅朮 桂枝 葱白頭 豬苓 草果 知母 薑汁

年開花甲。病逾旬日。遠途歸家。舟輿跋涉。病中勞頓。雪上加霜。欲詢病原。無從細究。刻診脈象沉糊。神識蒙昧。舌強色白。中心焦燥。身熱不揚。手足寒冷。氣短作呃。便泄滯臭。憑理而論。是屬伏邪挾積。正虛邪陷之象。深恐有厥脫之虞。勉酌一方。還祈明正。

人參 大黃 附子 柴胡 半夏 茯苓 陳皮 黃芩 丁香 當歸 枳實 柿蒂 澤瀉
竹茹

伏暑爲病。溼熱居多。陰虛之體。邪不易達。此其常也。然就陰虛而論。大有輕重之分。須知此證虛亦不甚。邪亦不多。卽據耳鳴眩悸。苔濁胸痞。微寒微熱。脈形絃數立方。未便着手大補。亦不可重劑攻邪。但得脈情無變。可保無虞。慎勿徒自驚惶。反增他變。

洋參 茯神 甘菊 薏仁 陳皮 青蒿 鈎鈎 刺蒺藜 半夏 秫米 豆卷 竹茹

瘧疾

伏邪挾積。阻塞中宮。瘧發日輕。日重。重則神糊煩躁。起臥如狂。此乃食積蒸痰。邪熱化火。痰火上蒙。怕其風動痙厥。脈沉實而舌苔黃。邪積聚於陽明。法當通下。仿大柴胡例。

柴胡 黃芩 川朴 枳實 瓜蒌仁 半夏 大黃

又 昨日瘧來手足寒冷。即時腹中氣脹。上塞咽喉。幾乎發厥。但不昏狂耳。此乃少陽瘧邪。挾內伏之痰濁。上走心胞爲昏狂。下乘脾土爲腹脹。前日之昏狂病機。偏在陽明。故法從下奪。今腹脹舌白脈細。病機偏在太陰。法當辛溫通陽。轉運中樞爲要矣。隨機應變。急者爲先。莫謂用寒用熱之不侔也。

乾薑 陳皮 茯苓 草果 熟附 川朴 蔻仁 檳榔 丁香 通草

陳無擇云。瘧家日久。必有黃痰宿水。聚於胸腹膈膜之中。須得脾土旺而後宿水自行。元氣復而後溼痰自化。余見久瘧有泄水數次而愈者。卽宿水自行之效也。

六君子湯加炮薑 木香 神麴 砂仁

三瘧久延。營衛兩傷。復因產後。下焦八脈空虛。今病將九月。而瘧仍未止。腹中結塊偏左。此瘧邪留於血絡。聚於肝膜。是屬瘧母。淹纏不止。慮成瘧勞。夏至在邇。乃陰陽剝復之際。瘦人久病。最怕陰傷。趁此圖維。迎機導竅。和陽以生陰。從產後立法。稍佐搜絡以杜瘧邪之根。

製首烏 杞子 地骨皮 當歸 白芍 冬朮 川芎 青皮 香附 烏梅 龜甲煎丸

又瘧久結癖。夏至前投和陽生陰。通調營衛。參入搜絡方法。節後三瘧仍來。但熱勢稍減。癖塊略小。然口渴心悸。營陰大虧。情懷鬱勃。多致化火傷陰。木曰曲直。曲直作酸。瘧來多沃酸水。蓋肝木鬱熱。挾胃中之宿飲。上泛使然。夫養營陰。須求甘潤。理肝鬱。必用苦辛。久瘧堪截。癖塊宜消。惟是體虛胃弱。諸宜加謹。爲上。

黨參 龍甲 當歸 茯神 棗仁 香附 川連 冬朮 陳皮 牡蠣 三稜

■黃瘰

三瘰止而復作。腹滿平而又發。今日黃脈細。面黑溺少。防延黑瘰。然瘰而腹滿者難治。姑與分消。

茵陳 山梔 赤苓 滑石 陳皮 大腹皮 附子 通草 麥芽 瓜蒌皮

兩目及身體皆黃。小便自利而清。此屬脾虛。非溼熱也。名曰虛黃。

黃耆 白芍 地膚子 茯苓 酒浸服

■脘腹痛

肝胃氣痛。痛久則氣血瘀凝。曾經吐血。是陽明胃絡之血。因鬱熱蒸迫而上也。血止之後。痛勢仍作。每發於午後。診脈小緊數。舌紅無苔。乃血去陰傷。而氣分之鬱熱。仍阻於肝胃之絡。而不能透達。宜理氣疎鬱。取辛通而不耗液者爲當。

川棟子 延胡 鬱金 香附 茯苓 陳皮 旋覆花 山梔 白螺螄殼 左金丸

素有肝胃氣痛。兼有寒積。脘痛脹滿。痛及於腰。刻不可忍。舌苔白膩。渴不欲飲。大便似利不利。脈象沉絃而緊。按證恐屬藏結。頗爲險候。非溫不能通其陽。非下不能破其結。仿許學士溫脾法。

乾薑 附子 肉桂 川朴 枳實 大黃

又兩投溫下。大便仍然不通。胸腹高突。湯水下咽輒嘔。支漸冷。脈漸細。鼻煽額汗。厥脫堪憂。按結胸藏結之分。在乎有寒熱無寒熱爲別。下之不通。脹滿愈甚。乃太陰脾藏受戕。清陽失於轉運。崔行功有枳實理中一法。取其轉運中陽。通便在是。挽回厥脫亦在是。

人參 枳實 炮薑 川附 陳皮 冬朮

■ 癥 癖

前年秋季患伏暑。淹纏百日而愈。病中卽結癥積。居於左脇之下。入春以來。每至下午必微熱。清晨必吐痰。食麪必溏洩。此必當時熱邪未盡。早進油膩。

麪食。與痰氣互相結聚於肝胃之絡。當漸消之。否則或脹或鼓。均可慮也。

柴胡 青皮 三稜 雄黃 大黃 莪朮 右藥爲末神麪糊丸橘紅湯下

少腹兩旁結塊。漸大漸長。靜則夾臍而居。動則上攻至脘。旁及兩脇。八九年來如是。據云當年停經半載。皆疑爲孕。及產多是污穢臭水。嗣後遂結此塊。想係水寒氣血瘀聚而成。當溯其源而緩圖之。

甘遂 香附 三稜 莪朮 桃仁 肉桂 五靈脂 地龍蟲 川棟子 共研末煉蜜爲丸一

日三服

久患休息下痢。或作或輟。四月下旬痢止數日。忽然氣攻胸脘板痛。上下不通。幾乎發厥。及至大便稍通。板痛遞減。匝月以來。大便僅通三次。今又不通十餘日矣。而其脘中之板痛者。結而成塊。偏於右部。是脾之積也。脈極細而沉緊。面色晦滯。陽氣鬱伏。濁陰凝聚。當與溫通。

附子 乾薑 川朴 陳皮 茯苓 香附 延胡 大腹皮 五積丸 沉香化氣丸

脈右關滑動。舌苔黃白而膩。是痰積在中焦也。左關絃搏。肝木氣旺。故左肋斜至臍下有梗一條。按之覺硬。乃肝氣入絡所致。尺寸脈俱微緩。泄痢一載。氣血兩虧。補之無益。攻之不可。而病根終莫能拔。病根者何。痰積溼熱肝氣也。夫溼熱痰積。須藉元氣以運之外出。潔古所謂養正積自除。脾胃健則溼熱自化。原指久病而言。此病不爲不久。攻消剋伐。何敢妄施。茲擇性味不猛而能通能化者用之。

人參 茯苓 於朮 青陳皮 炙草 澤瀉 枳殼 神麴 茅朮 當歸 白芍 黃耆
防風根 金鈴 延胡 木瓜

又九方 製半夏 用木香白芥子烏藥金鈴子猪苓各煎汁依次炒畢去諸藥僅以半夏爲末入雄精末射香獨頭蒜打爛用醋打和爲丸每晨服開水送下

心之積名曰伏梁。得之憂思而氣結也。居於心下胃脘之間。其形豎直而長。痛發則嘔吐酸水。兼挾痰飲。肝氣爲患也。開發心陽。以化濁陰之凝結。兼平

肝氣而化胃中之痰飲。

桂枝 半夏 川連 茯苓 陳皮 薏仁 鬱金 延胡 川棟子 石菖蒲 瓦楞子

病由肝氣橫逆。營血不調。腹中結癥。脘脇攻痛。漸致食減。內熱。欬嗽痰多。當臍動跳。心悸少寐。口乾腸燥。是皆血痺虛勞之象。極難醫治。姑仿仲景法。

黨參 茯苓 棗仁 乳香 沒藥 桃仁 當歸 川貝 香附 地龍蟲 白蜜

又前方養營化痰。得下血塊兩枚。腹滿稍軟。內熱欬嗽未減。今日和營啓胃。退熱止欬。再望轉機。

黨參 茯苓 丹參 陳皮 川貝 杏仁 當歸 阿膠 血餘炭 地龍蟲

腫脹

病起欬嗽。欬止而反氣升。入暮尤甚。面跗龐然浮腫。腹雖未滿。而按之不軟。此屬腎風。蓋風邪乘虛而入於腎。腎氣上逆。故入暮而氣升爲甚。用五苓通膀胱。導出腎中之邪。加細辛以徹少陰之寒風。晚上再進都氣丸以安其腎。庶

幾久蘊之邪得解。而腎藏無傷。切弗輕視此病。須防腹滿之虞。

五苓散 加大腹皮 陳皮 細辛 肉桂

水腫自下而起。腿足陰囊大腹胸膈咽喉。無處不受其災。水勢泛濫浩浩。莫禦矣。今先從上瀉下。蓋肺主一身之氣。又曰水出高源。古人開鬼門。潔淨府。雖曰從太陽著手。其實亦不離乎肺也。

葶藶子 杏仁 川朴 陳皮 茯苓 椒目 薑棗 控涎丹

痞塊由大瘡日久而結。多因水飲痰涎。與氣相搏而成。久則塊散。腹滿變爲臃脹。所謂癰散成臃也。脈細如絲。重按至骨。乃見弦象。是肝木乘脾也。口乾小便短少。是溼熱不運也。匝月腹日加大。急宜疏通水道。泄木和中。

五苓散 加川朴 川連 青皮 陳皮 大腹皮 木香 車前子 通草 另服古方厚朴散

川朴 枳殼 木香 青皮 陳皮 甘遂 大戟 乾薑 共爲末用砂仁車前子泡湯調下

疝 疫

爛喉痧證。來勢甚暴。甫周一日。丹疹密隱。咽喉已腐。壯熱無汗。大便泄瀉。煩躁渴飲。脘腹按之痛。邪不外達。熾盛於裏。燎原之勢。不可嚮邇。恐其遽爾內陷。昏喘生變。現在方法。辛涼透散。通同一律。無所短長。鄙見莫若且用涼膈散。上者上達。表者表達。裏者下達。庶幾熱從外出而痧透。火從下洩而躁安。按內經病機。暴注下迫。皆屬於熱。仲景方論急下之法。正以存陰。幸勿拘現患泄瀉而遂謂不可再下也。雖然。智愚千慮。各有得失。尙祈高正是荷。

涼膈散 加牛蒡子 桔梗 枳實

又投涼膈散。煩躁略安。脘痛已止。胸膈之燔。稍衰其勢。而咽喉紅腫。乾欬嗆逆。上炎之火。未熄其威。况丹痧一片。點粒模糊。證交三日。正屬邪張之際。尙在險途。未歸坦境。擬方再望轉機爲妙。

犀角 連翹 元參 川貝 桔梗 鮮石斛 牛蒡子 鮮薄荷根 蘆根

痧回熱減。溫邪初退之餘。咽喉反腐。虛火又從而附之。良由久患喉痺。陰

虛火亢。熱淫搖動。亢欲復張。用方最宜加謹。過清恐傷脾胃。早滋恐戀餘邪。姑擬甘涼法平調肺胃。冀得上焦清肅。

鮮石斛 大貝 元參 生草 丹皮 沙參 羚羊角 扁豆 稽豆衣 雪梨

遺精

病由喪子。悲憤抑鬱。肝火偏盛。小水淋濁。漸至遺精。一載有餘。日無虛度。今年新正。加以左少腹。睪丸氣上攻胸。心神狂亂。齟血目青。皆肝火亢盛。莫制也。經云。腎主閉藏。肝司疏泄。二藏皆有相火。而其系上屬於心。心爲君火。君不制相。相火妄動。雖不交合。精亦暗流而走泄矣。治法當制肝之亢。益腎之虛。宗越人東實西虛。瀉南補北例。

川連 黑梔 延胡 赤苓 沙參 川棟子 鮮地 知母 黃柏 龜板 芡實 當歸龍薈

丸

左尺極細。寸關微而似數。右三部俱絃滑。下有遺精暗疾。肛門癢而出水。

上則頭眩耳鳴。舌苔粉白。以脈合證。腎陰下虧。而溼熱相火。下淫上混。清竅爲之蒙閉。法當補腎之陰。以清相火。清金和胃。分利膀胱。以化溼熱。

大生地 龜板 牡蠣 懷山藥 麥冬 萆薢 澤瀉 赤苓 丹皮 知母 半夏 黃柏

又九方 大生地 冬朮 黃連 苦參 天麻 懷山藥 丹皮 牡蠣 麥冬 龜板 川芎

半夏 芡實 萆薢 澤瀉 赤苓 黃柏 知母 右藥爲末。用建蓮粉神麴煮糊。搗丸。

■ 小便

先腹痛數日。遂至小便不利。少腹脹滿如鼓。今已半月。屢用通利之藥。小便雖通不爽。少腹脹滿益甚。診脈絃緊。舌苔白膩。飲食少納。身無寒熱。大便頻泄。黏膩如痰。此中陽不足。水溼泛溢。膀胱氣化無權。法當溫土以禦水寒。通陽以化溼濁。

乾薑 肉桂 茯苓 澤瀉 茅朮 木香 茴香 牛膝 烏藥

腎開竅於二陰。前有淋濁之新恙。後有腸紅之舊疾。皆由於陰虛而有溼。

熱也。寓育陰於利水清熱之中。猪苓湯合加味槐花散主之。

茯苓 猪苓 阿膠 生地 槐米 枳殼 六一散 血餘炭 側柏炭

小便頻數。溺後有血絲血塊。此膀胱有熱。腎虛有火。逼衝任之血而下走前陰也。法當通瀉兼行。

生地 阿膠 川連 赤苓 龜板 黃柏 大黃 血餘 車前子

痢疾

從來肺有積熱者。大腸必燥。以相爲表裏故也。三五年來屢發喉證。肺熱可知。今秋齟腫出血。多服涼藥及西瓜等物。遂患下痢赤白。常有乾糞夾雜其中。延及百日。近見堅栗而痢反更甚。此必有故。夫脾受瓜果之寒溼。既下流於大腸而爲痢。則大腸之燥當除。今獨不然。竟若燥與溼各樹旗幟。相爲犄角之勢。豈非以脾屬中土而主溼。大腸屬燥金而主津。津虧則燥益堅。脾虛則溼愈甚耶。昔秦氏論痢有溼火傷氣。燥火傷血之分。此則溼燥兩傷。擬撰一方潤燥

兼行。氣血兼理。或通或塞。均非所宜。

全瓜蒌 當歸 木香 川連 甘草 升麻 藕 陳火腿足骨

伏暑溼熱之邪。挾積內蘊。胸痞嘔惡。發熱舌燥。通府之後。變爲下痢。痢色紅白膩凍。仍然痞塞嘔惡。飲食不納。勢成噤口重證。須得胃開納穀。痢減不嘔。爲妙。閱諸高明方。層次轉折。各有主意。姑擬一方商正。

川連 黃芩 白芍 青皮 川朴 陳皮 神麴 茯苓 北沙參 砂仁 生熟穀芽

玫瑰花

脈經云。代則氣衰。細則氣少。多指陽氣而言。今下痢而得是脈。脾腎之陽微特著。況形衰畏冷。而小便清長乎。惟下痢赤者屬血分。腹中痛者爲有積。立方當從此設想。蓋尋其罅而通之補之。亦治病之巧機也。

駐車丸 附子枳實理中湯送下

便痢白膩如水晶魚腦色。小便不利。少腹偏右板窒。諸醫以爲腸癰。固亦

近是。然考腸癰爲病。有寒有熱。金匱並出二方。如大黃牡丹湯。薤仁附子敗醬散。概可見矣。此證則屬寒積。試觀脈弦緊而不數。面色青而不渴。是其徵也。鄙意宜用溫通。備候商訂。

肉桂五苓散 加砂仁 查肉

紅痢匝月。仍然腹痛後重。據云先曾發瘧三次。此屬中虛表邪傳裏。現今脈細肢寒。中焦陽氣已弱。小便艱難。膀胱氣化又鈍。擬香連兼化其溼熱。柴苓以解其表邪。是亦表裏兩解之法也。

柴胡 桂枝 茯苓 澤瀉 川連 木香 黨參 白朮 炮薑 炙草 砂仁

便血

痔血雖自大腸來。亦屬脾虛溼熱。至於大瘡。古云邪伏三陰。薛立齋云三陰者脾也。上年瘡止。直至今夜復作。未免又有暑邪內伏。近日痔血相兼爲患。擬用清暑益氣湯加味。內化熱溼。外解新邪。總以益氣扶中爲主。俾中樞一運。

自然內外分消矣。

黨參 炙草 黃耆 蒼朮 冬朮 當歸 麥冬 五味 青皮 陳皮 神麴 黃柏 葛根

升麻 澤瀉 防風 蜀漆 赤苓 煨薑 大棗

又 素有便血之證。而患大瘧日久。凡患大瘧。其始必有寒邪。邪入三陰。大瘧成焉。若陰虛之人。寒久必化爲熱。熱陷三陰。便血作焉。而三陽之寒仍在也。溫三陽之陽。以少陽爲始。清三陰之熱。以少陰爲主。然血既由大腸而出。又當兼清大腸。方用棉子肉。內具生氣。溫少陽之陽也。鮮首烏性兼潤血。清少陰之熱也。柿餅灰性涼而瀉。清大腸之血也。標本並治。雖不中不遠矣。

棉子肉 柿餅灰 鮮首烏 神麴 養爛搗丸聚湯下

腸胃有溼熱。溼鬱生痰。熱鬱生火。大便下血。晨起吐痰。熱處溼中。溼在上而熱在下。治上宜化痰理溼。治下宜清熱退火。用二陳合三黃爲法。

半夏 陳皮 茯苓 川連 黃芩 杏仁 胡黃連 地榆皮 側柏葉 百草霜

腸痔脫肛便血。其根已久。有時舉發。而脈象細數。營陰大傷。面黃少神。脾氣大困。兼之腹中鳴響。脾陽且不運矣。一切苦寒止血之藥。非惟少效。抑恐碍脾。擬東垣黑地黃丸法。

熟地 炮薑 黃耆 茅朮 五味 黨參 荷葉蒂

蟲病

閱病原是屬蟲病無疑。蟲由脾土不運。溼熱蒸化而生。其發於月底之夜。乃由脾胃虛寒。寒屬陰。故夜發也。寒久化熱。土虛木強。其發移於月初。必嘔吐胸熱。乳下跳動。蟲隨酸苦痰涎而出。多寡不一。時或見於大便。腹中微痛。雖渴甚不能嚥水。水下復嘔。嘔盡乃平。至中旬則康泰無恙矣。所以然者。月初蟲頭向上。且病久多嘔。胃陰虧而虛火上炎。故胸中覺熱也。虛里跳動。中氣虛也。中氣者乃胸中大氣。脾胃冲和之氣。皆歸所統。今中氣虛甚。故跳躍也。病延一載。蟲屬盤踞。未易一掃而除。圖治之法。和中調脾。以杜生蟲之源。生津平肝。以治

胸熱口渴。化溼熱。降逆氣。以治嘔吐。久服勿懈。自可見功。欲求速效。恐不能耳。

川棟子 蘼蕪 黨參 白朮 使君子肉 半夏 陳皮 青皮 白芍 茯苓 焦六麴

乾薑 梔子 薏仁

婦人

脈輕按虛微。是爲元氣之虛。重按細數。是屬營陰之損。左尺細弱。腎水虧也。歷診病情。每遇經來。其熱輒甚。舌上卽佈白苔。良以胃中溼濁。因裏熱熏蒸而上泛也。少腹有塊。攻痛聚散無常。是名爲瘕。瘕屬無形之氣。隸乎肝腎爲多。揆其致病之由。因日疾過服苦寒。戕伐生生之氣。胃受寒則陽氣鬱而生溼。肝受寒則陰氣凝而結瘕。陽氣鬱於胸中。故內熱。陰氣凝於下焦。故腹痛。經事過則血去而陰虛。故其熱甚。甚則蒸溼上泛。故舌苔濁厚也。刻下將交夏令。火旺水衰。火旺則元氣耗而不支。水衰則營陰涸而失守。惟恐增劇耳。圖治之法。補脾胃以振元氣。培肝腎以養營陰。是治其本也。稍佐辛溫。宣通下焦陰氣。是兼

治其痼痛之標也。

黨參 黃耆 冬朮 茯苓 炙草 歸身 萸肉 首烏 木香 白芍 馬料豆 生熟穀芽
憂愁抑鬱。耗損心脾之營。而肝木僭逆。胸中氣塞。內熱夜甚。經事兩月不來。脈沈而數。熱伏營血之中。擬用柴胡四物湯和營血以舒木鬱。

黨參 冬朮 生地 當歸 白芍 香附 青蒿 白薇 生熟穀芽

病起當年產後。雖經調理而痊。究竟營虛未復。是以至今不育。且經事乖而且多。亦營虛而氣不固攝之故。自上年九秋。又感寒邪。入於肺爲咳嗽。痰中帶血。此謂上實下虛。血隨氣逆。蔓延旬日。加以內熱。漸成勞損。姑仿仲景法扶正化邪。以爲下虛上實之法。

生地 黨參 炙草 當歸 豆卷 前胡 茯苓 懷藥 麥冬 阿膠 川貝 杏仁 桂枝

枇杷葉

又進薯蕷丸法。補氣血。生津液。徹風邪。咳嗽已減。所謂上實下虛。病情不謬。

據云當年產後。腹中常痛。至今未愈。顯見營分有寒。已非一日。但內熱淹纏。心悸頭眩。久虛不復。終爲勞損。茲從八珍加減。複入通補奇經。王道無近功。耐心安養爲是。

十全去蒼芎 加阿膠 艾 炮薑 紫石英 陳皮 麥冬 款冬花 川貝 神麴 大棗

欬嗽發熱日久。前投補益脾胃之藥六七劑。食穀加增。起居略健。但熱勢每交寅卯而盛。乃少陽旺時也。少陽屬膽。與肝相爲表裏。肝膽有鬱熱。戕伐生生之氣。肺金失其清肅。脾胃失其轉輸。相火日益熾。陰津日益涸。燎原之勢。不至涸極不止也。其脈弦數者。肝膽鬱熱之候也。刻下初交夏令。趁其胃旺。加餐擬進酸苦法。益陰和陽。清徹肝膽之鬱熱。考古方柴前連梅煎。頗有深意。錄出備正。

柴胡 川連 白芍 前胡 烏梅 麥冬 黨參 秋石 炙草 薤白

經行後奔走急路。冷粥療饑。少腹疼痛。連腰脇兼及前陰。此肝腎受傷。又

被寒侵而熱鬱也。經云遠行則陽氣內伐。熱舍於腎。冷粥入胃。則熱鬱不得伸。故痛也。遵寒熱錯雜例兼腹痛治法。

川連 炮薑 桂枝 白芍 全當歸 木通 香附 查炭 黑梔 旋覆花 猩絳

內經有石瘕石水之證。多屬陽氣不布。水道阻塞之證。少腹有塊堅硬者。爲石瘕。水氣上攻而腹滿者。爲石水。此證初起小便不利。今反小便不禁。而腹漸脹滿。是石水之象。考古石水治法。不越通陽利水。淺則治膀胱。深則治腎。久則治脾。茲擬一方備採。

四苓散去豬苓 加大腹皮 陳皮 桑白皮 川朴 烏藥 桂枝 雞內金

體氣素虛。頻年屢患欬嗽。今春產後悲傷。欬嗽復作。背寒內熱。氣逆痰多。脈虛數。大便溏。延今百日。病成蓐勞。按產後血舍空虛。入脈之氣先傷於下。加以悲哀傷肺。欬嗽劇發。震動衝脈之氣上逆。經云衝脈爲病。逆氣裏急。陽維爲病。苦寒熱。頻進疏風清熱。脾胃再傷。以致腹痛便溏。食減無味。斯皆見欬治欬。

之弊。越人謂上損及脾。下損及胃。俱屬難治。姑擬通補奇經。鎮攝衝脈。複入扶脾理肺。未能免俗。聊復爾爾。

熟地 當歸 白芍 紫石英 牛膝 茯苓 川貝

乳房屬胃。乳汁血之所化。無孩子而乳房膨脹。亦下乳汁。此非血之有餘。乃不循其道。以下歸衝脈而爲月水。反隨肝氣上入乳房。變爲乳汁。事出反常。非細故矣。夫血猶水也。氣猶風也。血隨氣行。如水爲風激而作波瀾也。然則順其氣。清其火。熄其風。而使之下行。如風迴波轉可也。正何必參堵截之法。澀其源而止其流哉。噫。可爲知者道。難與俗人言也。

元精石 赤石脂 紫石英 寒水石 牡蠣 大生地 白芍 歸身 茯神 烏藥 麥芽

郁李仁